

PUEBLO TA SIGUI GASTA AWA Y CORIENTE Y PESEY WEB MESTER A BUSCA BOILER NOBO

ORANJESTAD (AAN): Den fin di siman cu a pasa WEB Aruba NV a ricibi nan di seis boiler for di e companianan Sumitomo Corporation di Japon, Babcock & Wilcox y Cerrey ambos di Mexico.


Durante di e ceremonia, Director General di WEB, ing. Laclé a tene un discurso pa tur presente den cual el a trece informacion valioso pa comunidad y speciaalmente un yamada na e consumidor pa no malgasta awa y coriente y haci uso conciente y controla di e productonan aki.

Por a ripara cu tur hende ta contento cu Boiler #6 oficialmente worde entrega door di Sumitomo Corporation na WEB. Segun ing. Laclé, e tipo di ocasion aki pa WEB ta hopi importante, pasobra cada un ta refleha un paso mas riba e bon caminda. E caminda cu lo garantiza e suministro continuo y eficiente di awa y electricidad na e clientenan. Den e caso specifico di awe, e produccion confiable y eficiente di suficiente vapor pa produci awa y electricidad cu ta di suma importancia pa desarojo di Aruba.

ing. Laclé a muestra cu despues cu pa ultimo biaha den e periodo 1964-1965, tres boiler nobo a drenta den servicio pa cubri e demanda creciente pa awa y coriente e tempo ey, na comienzo di 1991 nan a realiza cu expansion cu un boiler nobo a bolbe bira necesario. Dia 6 di Mei nan a firma un acuerdo cu Sumitomo Corporation di Japon pa construi e boiler aki.

E compra di Boiler #6 ta un inversion di diesseis y mey milyon Florin Arubano y a worde financia pa un grupo di instancia financiero bao guia di Nationale Investeringsbank (N.A.) NV y tambe Gobierno Hulandes via di KABNA y di WEB mes.

Despues di trabao excelente di tur esnan involvi, a logra dentro di diesnuebe luna despues cu a firma, pa e boiler a pasa su testnan final cu exito. Cu entrega di e boiler aki, cu tin un capacidad pa produci 136 ton di vapor pa ora, na un temperatura di 482 grado Celcius y di presion hopi halto, nan tin awor seis boiler na Balashi.



Director di WEB ta pidi clientenan pa por favor no malgasta awa y coriente. Sea conciente di bo consumo y controla e uso. Door di aumento di demanda, pesey mester a busca e Boiler nobo aki!

ing. Laclé a agrega cu WEB su experiencia cu e tipo di diseño y construccion di e boiler aki, esta Babcock & Wilcox ta uno hopi largo y excelente. Tabata na 1958 cu Babcock & Wilcox a construi su prome boiler pa Aruba.

BOILER EFICIENTE

E boiler aki ta e di ocho di e tipo aki cu Babcock & Wilcox a construi na Aruba, aunke door di diferente com-

pania. Segun ing. Laclé, cu e boiler aki nos a logra suficiente capacidad pa e añanan cu ta bin. Pero esaki ta depende naturalmente na e grado di crecimiento den e demanda.

"Mi kier a haci uso di e oportunidad pa un biaha mas haci un yamada sincero riba nos clientenan pa por favor no malgasta awa y coriente."

Sea conciente di bo consumo y controla e uso di e productonan tan importante, manera awa y coriente.

Cifranan di 1995 ta indica un aumento di 12 por ciento den e consumo di coriente y di 5 por ciento pa awa.

Segun ing. Laclé, esaki ta porcentahenan sumamente halto y no por worde splica solamente cu e aumento di poblacion den e ultimo añanan. "Nos tin indicacion fuerte cu e consumo average pa persona a aumenta. Nos cada un ta usa mas awa y coriente. E pregunta ta pakico."

"Kizas nos no ta usa awa y

coriente cu suficiente atencion cu ta costa hopi pa produci e productonan aki. WEB mester a haci un inversion di 16,5 milyon Florin pa un boiler nobo y aña pasa ya a cumpra un planta nobo di awa di 17 milyon Florin, naturalmente nos ta cumpra nan den exterior y e placa aki nunca ta bin Aruba back."

El a sigui bisa: "Pa cada boiler produci vapor nos ta kima combustible, azeta, cu a lo largo ta bin di exterior, esaki tampoco ta bin back den economia di Aruba. E ta costa nos pais hopi, pa cumpli cu e demanda creciente pa awa y coriente. Pa e motibo aki ban percursa pa nos tur ta mas conciente di e uso di awa y coriente."

Den number di gerencia di WEB, ing. Laclé a gradici tur esnan cu di un of otro manera a contribui pa haci e proyecto aki un exito: Na Sumitomo, na e contratis-tanan di exterior: Cerrey Mexico, Babcock & Wilcox Mexico, National Boiler-works, Foxboro y e contratis-tanan local Arcos, Albo, Croon, Arimco, nan palabra di gradicimento.

Especialmente nan a felicita y gradici Kees Brussé di Kema NV, y Charles Williams kende tabata lider di e proyecto aki pa parti di WEB Aruba NV y hopi empleado di WEB Aruba NV cu tabata involvi.

— Di sector Asuntonan Tecnico Empresarial, e Projectbureau bao guia di Ramiro de Cuba, pero tambe e team di Bedrijfsbureau bao guia di Alfredo Koolman.

— Di e sector Manten-cion, e seccion di Meet & Regel bao guia di Jacintho Ruiz, Onderhoud Centrale bao guia di Luis Rincones, Elektro cu Angelo Arends y su team.

— Di sector Produccion, e chefnan di warda y tur e grupo di Produktie Centrale, tambe e coordinador di proyecto centrale, Pachi Theodora.

— Y diferente otro Departamento y seccion manera magazijn, sector di Asuntonan Financiero Economico, na tur empleado di WEB Aruba NV kendenan a contribui den construccion y start-up di e boiler, el a manda su palabra di elogio y felicitacion pa un bon trabao. Pabien tambe di DIARIO.